



Cuschiniers en accziun durant il grond final sin il lai da San Murezzan.

FOTOS A. METTLER

# In punct culminant suenter l'auter

San Murezzan: Il 21. Gourmet Festival è a fin

DA GION NUTEGN STGIER / ANR

■ **Bunamain 4000 persungas han durant in'emna be mangià e bavi il meglier dal meglier. Il Gourmet Festival a la fin da schaner attira er adina daplis novs mangiabains. A fin è l'occurrENZA ida cun ina tschaina da gala nua che be «VIP'S» èn stads da la partida.** Nagina crisa economica tar ils visitaders dal Gourmet Festival 2014 en l'Engiadin'Ota. Da tuts tschintg continents da quest mund èn ils gourmets vegnids en rotscha a San Murezzan per giudair las tratgas finas dals otg cuschiniers internaziunals. Durant in'emna han gi lieu bunamain 40 occurrenzas culinaricas superlativas. Ultra da quai han ils cuschiniers da num e pum envidà mintga saira participantas e participants dal festival ad uschenumnads Gourmet Dinners en ils hotels da luxus. Per ils mangiabains ina vaira aventura, han els pudì mintga di examinar autras tratgas finas, senza viagar tras l'entira Europa, ils Stadis Unids da l'America u il Giapun. Las persunas cun buccas e nas fins han lura er constatà ch'ils cuschiniers fan gugen experi-

ments, èn innovativs e cumbineschan spacias tradiziunals cun novas tratgas d'emprima classa.

### Da cuschina tar cuschina

Ina vaira aventura èn stadas las Gourmet Safaris nua ch'ils mangiabains èn vegnids pupragnads culinaric dals stars cuschiniers e quai en cuschina. Suenter mintga plat han ils gourmets midà lieu e cuschina e vegnids manads cun autos da luxus en il proxim hotel per cuntinuar la Gourmet Safari. Cun ils cuschinunzs da renum internaziunal han lura ils mangiabains pudì star a maisa, sagiar e gustar las piculezzas finas e da bun gust. In ulteriur punct culminant da l'emna culinarica è er stada la Kichen Party en la cuschina da l'Hotel Palace a San Murezzan. Tar quel event culinaric han ils mangiabains giudi las creaziuns singularas dals otg cuschiniers d'emprima classa e lura er vins e schampagn da buna qualidad. A fin è l'occurrENZA ida cun la tschaina da gala en la tenda sin il lai da San Murezzan nua che cuschiniers ed organisaturs han mess cun quel banchet da gala la curuna sin l'emna culinarica.

### Il 2015 ina ediziun speziala


Reto Mathis, il president da las occurrenzas dal Gourmet Festival, è fitg cuntent cun l'ediziun da quest onn. El deplorescha bain che blers vulan copiar il festival per mangiabains da San Murezzan e conturn. El è dentant persuadi che sia occurrenza tutga sin il mund tar quels Gourmet Festivals cun il pli grond resun. Reto Mathis è dal reminent sez in cuschinier d'emprima classa ed el maina dapi 20 onns cun success plis restaurants da luxus a la Corviglia. L'Engiadinais è er quel cun ils buns contacts tar ils cuschiniers da renum internaziunal e la persuna che gira en l'entir mund per scuvrir tempels per mangiabains. Da quels ha Reto Mathis er chattà en la Gronda Britannia, il pajais dals cuschiniers che vegnan ad esser il 2015 da la partida tar la 22avla ediziun dal Gourmet Festival en l'Engiadin'Ota. Gia ussa pon ils mangiabains sa legrar d'in'emna cun tratgas englaisas e da la «British Special Edition» en connex cun l'anniversari da 150 onns sport d'enviern a San Murezzan.




Reto Mathis, il president da las occurrenzas dal Gourmet Festival, è sez in bun cuschinier.



Be bunas chaussas er sin il buffet da dessert en l'Hotel Palace a San Murezzan.



In plat sco l'auter per ils mangiabains.



Cun autos da luxus da hotel tar hotel durant la Gourmet Safari.



Tar in festival per mangiabains manca er betg il servis gentil.